

Taitus

Tok Pisin ©2015 J Glenn Calderwood
www.pngbiblesources.org

Taitus

1 ¹ Mi Pol mi raitim dispela pas. Mi wokman bilong God na mi aposel bilong Jisas Krai. Mi stap olsem bilong strongim bilip bilong ol manmeri God i bin makim bilong kisim bek, na bilong strongim save bilong ol long trupela tok. Na trupela tok i save stiaim ol long pasin i holi, ² na i givim hop long ol long kisim laip i stap oltaim oltaim. Bipo tru, taim dispela graun i no kamap yet, God i bin promisim laip. Na God i no save giaman. ³ Long rait taim Em i putim tok bilong Em long ol dispela samting long ples klia, na Em i yusim mi bilong autim dispela tok. God Bilong Sevim yumi i bin makim na tokim mi long autim tok bilong Em.

⁴ Mi salim dispela pas long yu Taitus. Long wanpela bilip yu pikinini tru bilong mi.

Papa God wantaim Krai Jisas Bilong Sevim yumi, i ken i mekim grasia long yu na mekim bel isi long yu.

Wanem kain man i ken i kamap elda bilong sios?

⁵ Long dispela as mi bin lusim yu long ailan Krit, bai yu ken i pinisim wok mi bin lusim, na bai yu makim ol elda bilong sios long olgeta taun olsem mi bin tokim yu long mekim. ⁶ Man i ken i kamap elda em mas i stap gutpela man na i no gat wanpela rong i stap we ol manmeri i tok baksait long em, na em i man bilong wanpela meri tasol, na ol pikinini bilong em ol i feitful na i stap gutpela na ol manmeri nabaut ol i no sutim tok olsem, "Ol i

pilai nabaut wantaim ol man na meri, na ol i no save harim tok bilong papamama.”⁷ Lida bilong sios em i wokman bilong lukautim sios bilong God, na long dispela as em mas i stap gutpela man na i no gat wanpela rong i stap we ol manmeri i tok baksait long em. Na em i no man bilong apim em yet, na em i no man bilong bel hat hariap, na em i no pas long ol strongpela dring bilong spak, na em i no man bilong bel hat hariap na solapim narapela manmeri, na em i no man i hangre long kisim planti samting.⁸ Na em i man i amamas long mekim gutpela long ol manmeri i no wantok bilong em, na em i lavim ol stretpela samting, na em i stiaim gut tingting na pasin bilong em yet, na em i stap stret long olgeta samting, na em i mekim pasin i holi long laip bilong em, na em i strongpela man bilong mekim wok.⁹ Em i mas holim strong trupela tok em i bin kisim, na bai em i ken i skulim ol manmeri long trupela tok, na bai em i ken i krosim ol manmeri i egensim trupela tok.

¹⁰ Long wanem, i gat planti manmeri i stap na ol i no save harim tok, na ol i save mekim tok nating, na ol i save giamanim ol manmeri. Ol lain i save katim skin ol i stap olsem.¹¹ Yu mas stopim toktok bilong ol. Long wanem, ol i bagarapim ol wan wan femili. Ol i autim tok i no gutpela tok bilong autim, na ol i mekim olsem bilong kisim planti samting tasol.¹² Wanpela man Krit, em i wanpela profet bilong ol Krit yet, em i bin tok olsem, “Ol manmeri Krit, ol i pulap long tok giaman, na ol i manmeri nogut tru olgeta, na ol i tingting tasol long kaikai planti na les nabaut.”¹³ Em i mekim trupela tok. Olsem na, yu mas krosim ol strong, bai ol i holim bilip i stret olgeta,¹⁴ na ol i no ken i pas long ol stori i no tru bilong ol Juda, na ol i no ken i pas long toktok bilong ol manmeri i tanim na lusim trupela tok.¹⁵ Olgeta samting em i klin bilong ol manmeri i klin long ai bilong God. Tasol wanpela samting em i no klin bilong ol manmeri i no bilip na i doti long ai

bilong God. Long wanem, tingting bilong ol wantaim bel bilong ol i doti pinis. ¹⁶ Ol i tok olsem, "Mipela save long God." Tasol pasin ol i mekim i soim olsem ol i givim baksait pinis long God. Laip bilong ol i sting tru, na ol i lain bilong sakim tok, na ol i no fit long mekim wanpela gutpela pasin.

Autim trupela tok bilong God.

2 ¹ Tasol yu, yu mas autim tok i pas olgeta long trupela tok bilong God. ² Yu mas tokim ol man i bikpela pinis na ol i mas i stap long gutpela tingting, na ol i mas i stap gutpela man long ai bilong manmeri, na ol i mas stiaim gut tingting na pasin bilong ol yet, na ol i mas holim strong trupela bilip, na ol i mas lavim manmeri, na ol i mas wok hat bilong i stap olgeta long wei bilong God. ³ Na tu ol meri i bikpela pinis ol i mas mekim pasin i holi, na ol i no ken i tok baksait long ol narapela manmeri, na ol i no ken i pas long ol strongpela dring bilong spak. Ol i mas wok long autim gutpela toktok, ⁴ na long dispela pasin ol i ken i trenim ol yangpela meri long lavim man na pikinini bilong ol, ⁵ na long stiaim gut tingting na pasin bilong ol yet, na long ol klinpela pasin, na long mekim gutpela wok long ples bilong ol yet, na long pasin bilong wanbel na helpim narapela manmeri, na long pasin bilong harim tok bilong man bilong ol. Ol i mas trenim ol long ol dispela samting na ol manmeri i no ken i tok bilas long tok bilong God. ⁶ Na wankain olsem, yu mas tok strong long ol yangpela man na ol i mas stiaim gut tingting na pasin bilong ol yet. ⁷ Long olgeta samting yu mas mekim gutpela pasin, bai ol manmeri i ken i luksave long yu na mekim wankain pasin. Na taim yu autim tok, orait yu mas autim long gutpela na stretpela wei i no gat asua, ⁸ na yu mas autim tok i stret na tru olgeta, bai wanpela man i no ken i daunim, na ol man i egensim yumi ol i ken i sem, na ol i no ken i painim wanpela rong bilong sutim tok nogut long

yumi. ⁹ Ol slev ol i mas i stap aninit tru long bosman bilong ol long olgeta samting. Ol i mas mekim gutpela wok i amamasim bosman, na maski long mekim tok pait long em. ¹⁰ Ol i no ken i stilim ol samting bilong bosman. Nogat. Ol i mas i mekim gutpela wok na bosman bai trastim ol long olgeta samting. Em olsem na long olgeta pasin bilong ol, ol bai mekim olgeta trupela tok bilong God Bilong Sevim yumi i stap naispela long ai bilong ol manmeri.

¹¹ Long wanem, grasia bilong God i kamap pinis, na long dispela grasia God i kisim bek olgeta kainkain manmeri. ¹² Na grasia bilong God i trenim yumi long lusim pasin bilong givim baksait long wei bilong God na long lusim ol pasin bilong dispela graun. Na grasia bilong God i trenim yumi long stiaim gut tingting na pasin bilong yumi yet na long mekim pasin i stret na long bihainim olgeta wei bilong God long dispela taim nau yumi stap long em. ¹³ Na grasia bilong God i trenim yumi long wetim gutpela hop bilong yumi we glori bilong bikpela God, Jisas Krai Bilong Sevim yumi, i kamap ples klia. ¹⁴ Em i bin givim Em yet bilong baim bek yumi long ol pasin bilong sakim lo, na bilong mekim klin wanpela lain manmeri i bilong Em yet, na bai ol i gat bikpela laik long olgeta gutpela pasin.

¹⁵ Yu mas tokaut klia long ol dispela samting. Yusim namba bilong yu bilong strongim ol na bilong krosim na stretim ol. Yu no ken i larim wanpela man i givim baksait long tok bilong yu.

Yu mas redi long mekim gutpela wok.

3 ¹ Yu mas tokim ol manmeri bai ol i holim tingting na ol i stap aninit long hetman na gavman, na ol i harim toktok bilong ol, na ol i redi long mekim ol gutpela wok. ² Ol i no ken i mekim tok nogut bilong wanpela man, na ol i no ken i tok pait, na

ol i mas i stap bel isi na mekim gutpela long narapela manmeri, na ol i mas mekim gutpela pasin bilong rispektim olgeta manmeri. ³ Long wanem, bipo yumi tu yumi bin i stap longlong olsem ol, na yumi i stap manmeri bilong sakim tok, na yumi paul long trupela rot, na yumi i stap slev bilong ol kainkain pasin bilong dispela graun na bilong mekim amamas bilong bodi, na yumi bin yusim taim bilong yumi long mekim ol pasin nogut long ol narapela manmeri na long mekim ol jelas pasin, na ol manmeri i bin hetim yumi na yumi bin hetim ol. ⁴ Tasol, taim God Bilong Sevim yumi i putim gutpela wok na lavim bilong Em i kamap ples klia, ⁵ orait Em i bin sevim yumi. Em i no kisim bek yumi long stretpela pasin bilong yumi. Nogat. Em i kisim bek yumi long marimari bilong Em yet. Em i bin wasim yumi bilong mekim yumi kamap nupela gen, na Holi Spirit i kamapim nupela laip long yumi. ⁶ Long wok bilong Jisas Kraus Bilong Sevim yumi, God i kapsaitim Holi Spirit moa yet long yumi. ⁷ Na long grasia bilong God, God i givim stretpela pasin long yumi na kolim yumi "stretpela man", bai yumi ken i kisim ol gutpela samting i pas long hop bilong laip i stap oltaim oltaim. ⁸ Dispela tok i stap na yu ken i trastim, na mi laik yu tokaut strong long ol dispela toktok, bai ol manmeri i bilipim God ol i ken stiaim tingting gut na pas olgeta long mekim ol gutpela pasin. Ol dispela samting i gutpela samting tru na i save helpim ol manmeri. ⁹ Tasol yu mas givim baksait long tok pait i no gat as bilong em i stap, na long ol kainkain tok bilong lista bilong nem bilong ol tumbuna, na long olgeta kainkain tok pait bilong lo. Long wanem, ol dispela samting i no save helpim manmeri na i no gat yus bilong em i stap. ¹⁰ Na sapos wanpela man i mekim pasin bilong brukim sios, orait yu mas givim woning long em wanpela na tupela taim. Na sapos em i no harim tok, orait yu mas givim baksait long em olgeta. ¹¹ Yu mas save

olsem, tingting bilong dispela kain man i paul pinis na em i mekim sin, na pasin em i mekim i daunim em yet.

Las toktok.

¹² Taim mi salim Artemas o Tikikus i kam long yu, orait yu mas trai hat long kam long mi long taun Nikopolis. Long wanem, mi tingting long i stap long Nikopolis long taim bilong kol. ¹³ Yu mas trai hat long helpim loyaman Senas na Apolos long wokabaut bilong tupela yet. Tupela i no ken i sot long wanpela samting.

¹⁴ Na ol lain manmeri bilong yumi, ol i mas lainim gut na pas olgeta long mekim gutpela wok, bai ol i ken i helpim manmeri i nidim tru ol sampela helpim. Nogut ol lain manmeri bilong yumi i no karim kaikai long laip bilong ol.

¹⁵ Olgeta manmeri i stap wantaim mi i tok olsem, mipela no lusim tingting long yu. Tokim ol manmeri i bilip na i lavim mipela olsem, mipela no lusim tingting long ol.

Grasia i ken i stap wantaim yupela olgeta.